

Službene novine Kantona Sarajevo, broj 22/20

Na osnovu člana 26. i 28. stav (2) Zakona o Vladi Kantona Sarajevo ("Službene novine Kantona Sarajevo", broj 36/14-Novi prečišćeni tekst i 37/14-Ispravka) i člana 8. Zakona o naučnoistraživačkoj djelatnosti ("Službene novine Kantona Sarajevo", broj 26/16), Vlada Kantona Sarajevo je, na prijedlog Ministarstva za obrazovanje, nauku i mlade, a uz prethodno pribavljeno mišljenje Savjeta za nauku Kantona Sarajevo od 20.05.2020. godine, na 17. sjednici, održanoj 28.05.2020. godine, donijela

ODLUKU

O UTVRĐIVANJU NAMJENE, KRITERIJA I NAČINA RASPODJELE SREDSTAVA ZA PODRŠKU NAUČNOISTRAŽIVAČKOJ DJELATNOSTI NA PODRUČJU KANTONA SARAJEVO IZ BUDŽETA KANTONA SARAJEVO ZA 2020. GODINU

I

Ovom odlukom se utvrđuje namjena, kriteriji i način raspodjele sredstava iz Budžeta Kantona Sarajevo za 2020. godinu odnosno sufinansiranje naučnoistraživačkih/umjetničkoistraživačkih i istraživačkorazvojnih projekata iz Budžeta Kantona Sarajevo za 2020. godinu, a koja su osigurana u svrhu podrške Programima nauke na području Kantona Sarajevo u iznosu od 500.000,00 KM (petstotinhiljada KM).

Maksimalan iznos sredstava koji se može dodijeliti za sufinansiranje jednog projekta: 50.000,00 KM (pedesethiljada KM).

II

Sredstva iz tačke I ove odluke koristit će se za sufinansiranje naučnoistraživačkih/umjetničkoistraživačkih i istraživačkorazvojnih projekata iz Budžeta Kantona Sarajevo za 2020. godinu.

Sredstva za podršku naučnoistraživačkoj djelatnosti iz tačke I ove odluke se dodjeljuju u postupku javnog oglašavanja od strane Ministarstva za obrazovanje, nauku i mlade.

III

Dodjela sredstava za namjene iz tačke II ove odluke će se vršiti na osnovu kriterija kako slijedi:

Opći kriteriji za vrednovanje projektnih prijedloga:

- 1) utjecaj na daljnji razvoj područja istraživanja i praktična primjenjivost;
- 2) međunarodna/nacionalna kompetitivnost istraživanja;

- 3) kompetencije, kvalifikacije i dosadašnje iskustvo voditelja projekta i članova tima;
- 4) kvalitet projektnog prijedloga;
- 5) kvalitet naučne infrastrukture potrebne za realizaciju projekta kojom raspolaže aplikant;
- 6) adekvatnost i opravdanost finansijskog plana;
- 7) razvijanje institucionalne saradnje i partnerstva.

Posebna pažnja će se usmjeriti na naučnoistraživačke projekte čija će realizacija predstavljati naučnoistraživački doprinos sprečavanju, širenju i ublažavanju posljedica zarazne bolesti izazvane koronavirusom (COVID-19).

Posebni kriteriji za vrednovanje projektnih prijedloga:

(1) Realizacija projektnih aktivnosti obavezno obuhvata provođenje istraživanja čiji krajnji rezultat mora biti minimalno objavljen ili prihvaćen za objavljivanje jedan naučni rad u časopisu sa najmanje trećom kvartilom (Q3) po JCR za oblasti nauka čiji su časopisi indeksirani u WoSCC, odnosno Scopus bazi za naučne oblasti koje nisu pokrivena sa WoSCC, već isključivo Scopus bazom. Potvrdu o objavljivanju, odnosno prihvaćanju naučnog rada u časopisu propisane kvartile potrebno je dostaviti najkasnije dvije godine nakon isteka roka koji je u aplikaciji predviđen za okončanje projekta.

(2) Ne mogu se sufinansirati projekti čija realizacija zahtijeva neposredno provođenje projektnih aktivnosti od drugog pravnog subjekta (angažman podizvođača), ali aplikant može u realizaciji projektnih aktivnosti koristiti infrastrukturu drugih pravnih subjekata.

(3) U okviru realizacije projekta može se vršiti nabavka naučnoistraživačke/umjetničko- istraživačke opreme koja je nužna za uspješnu realizaciju projektnih aktivnosti i ostvarenje projektnih ciljeva, a koja se obavezno specificira u prijavnoj aplikaciji.

Pravo učešća imaju pravna lica koja:

(1) su registrovana za obavljanje naučnoistraživačke djelatnosti na bilo kojem nivou vlasti u BiH, a koja imaju sjedište na području Kantona Sarajevo,

(2) raspolažu naučnoistraživačkim kadrom, infrastrukturom i osnovnom opremom koja omogućava realizaciju planiranog projekta i postizanje postavljenih projektnih ciljeva.

Kriteriji za voditelja projekta/tim:

(1) da je voditelj projekta državljanin Bosne i Hercegovine i da je u radnom odnosu ili angažovan duže od jedne godine od dana objave Javnog poziva u ustanovi koja ima sjedište na području Kantona Sarajevo;

(2) da je voditelj projekta naučni radnik sa stepenom doktora nauka iz oblasti u koju spada projekat, koji ima najmanje dva objavljena rada u posljednjih pet godina u časopisima indeksiranim u WoSCC bazi podataka odgovarajuće kvartile u JCR-u (Q1-Q4), pri čemu oba rada ne mogu biti kvartile Q4, odnosno minimalno pet takvih objavljenih radova u dosadašnjem ukupnom naučnom radu od čega minimalno po jedan kvartile Q1 i Q2;

(3) za voditelja iz oblasti društvenih i humanističkih nauka koje nisu pokrivena WoSCC bazom potrebno je da voditelj projekta ima jednak broj radova kao pod (2) s tim da se vrednuje Scopus baza podataka;

(4) voditelj projekta iz oblasti umjetnosti treba ispunjavati sljedeće uvjete:

a) da posjeduje najmanje stepen magistra umjetnosti;

b) najmanje tri projekta iz oblasti umjetnosti (izložbe, koncerti, pozorišne predstave i filmovi) od izuzetnog društvenog značaja koji su realizirani u posljednjih 5 godina.

(5) u svojstvu voditelja projekta može biti angažovan član Akademije nauka i umjetnosti Bosne i Hercegovine i profesor emeritus;

(6) da naučnoistraživački/umjetničkoistraživački ili istraživačkorazvojni tim minimalno mora biti sastavljen od voditelja projekta, jednog saradnika i jednog istraživača;

(7) da se kroz realizaciju projektnih aktivnosti planiraju ili već provode istraživanja čiji će krajnji rezultat biti sticanje naučnog stepena doktora nauka nekog od članova projektnog/istraživačkog tima.

Realizacija projekta mora započeti u 2020. godini i biti okončana do kraja 2021. godine.

Isti projektni tim (isti voditelj projekta, istraživač i saradnik) može ostvariti pravo na sufinansiranje samo jednog projekta.

Komisija koju imenuje ministar Ministarstva za obrazovanje, nauku i mlade za evaluaciju pristiglih aplikacija/prijava, ovlaštena je da u postupku vrednovanja pristiglih prijava/aplikacija, pored utvrđivanja njihove blagovremenosti, potpunosti i urednosti, ocjenjuje i naučnoistraživački/umjetničkoistraživački i istraživačkorazvojni potencijal, te relevantnost projekta u odnosu na kriterije i uslove utvrđene Javnim pozivom i u skladu s tim vrši bodovanje projekta. U postupku vrednovanja projekta, Komisija je ovlaštena utvrditi objektivna i provjerljiva mjerila na osnovu kojih se stiče minimalan broj bodova koji je neophodan za sufinansiranje naučnoistraživačkog/umjetničkoistraživačkog i istraživačkorazvojnog projekta. Projekat koji ispunjava formalno-pravne uslove, a ne bude vrednovan minimalnim brojem bodova neće biti sufinansiran.

Komisija koju imenuje ministar Ministarstva za obrazovanje, nauku i mlade (na internet stranici Ministarstva) objavljuje preliminarnu listu dobitnika sredstava po javnom pozivu u roku od 30 dana od dana zatvaranja javnog poziva. U preliminarnim listama će biti naznačen rok za podnošenje prigovora.

Po okončanju roka za prigovor na preliminarnu listu, ministar za obrazovanje, nauku i mlade donosi odluku sa konačnom rang listom dobitnika sredstava i utvrđenim iznosima za svakog dobitnika sredstava po ovom javnom pozivu. Na osnovu odluke sa konačnom rang listom dobitnika sredstava i utvrđenim iznosima za svakog dobitnika sredstava vršit će se isplata dodijeljenih sredstava. Obaveze dobitnika sredstava preciznije će biti definisane ugovorom sa Ministarstvom za obrazovanje, nauku i mlade.

IV

Ministarstvo za obrazovanje, nauku i mlade će utvrditi koje dokaze o ispunjavanju uslova je potrebno priložiti prilikom apliciranja na javni poziv, kao i strukturu i sadržaj aplikacije koja se dostavlja za sufinansiranje po javnom pozivu.

V

Visina naknade za rad vanjskih/eksternih članova Komisije će se utvrditi posebnom odlukom ministra za obrazovanje, nauku i mlade.

VI

Izveštaj o utrošku sredstava iz tačke I ove odluke Ministarstvo za obrazovanje, nauku i mlade podnosi Vladi Kantona Sarajevo u skladu sa Zakonom.

VII

Ova Odluka stupa na snagu danom donošenja, a objavit će se u "Službenim novinama Kantona Sarajevo".

Broj 02-04-13850-8/20
28. maja 2020. godine
Sarajevo

Premijer
Mario Nenadić, s. r.